



МОНГОЛ УЛСЫН ИХ ХУРЛЫН ГИШҮҮНИЙ
АСУУЛГА

14201 Улаанбаатар хот, Сүхбаатар дүүрэг
Жанжин Д.Сүхбаатарын талбай 1, Төрийн ордон
Утас: 26-70-16, Факс: 32-70-16
E-mail: stategreatkhural@parliament.mn
http://www.parliament.mn

2021.07.29 № 25

Асуулга тавих тухай

Танд энэ өдрийн мэнд дэвшүүлье.

Монгол Улсын Их хурал нь хууль батлахын зэрэгцээ баталсан хуулийнхаа хэрэгжилтэд хяналт тавих бүрэн эрхтэй. Хуулийн хэрэгжилтийг хангаж ажиллах үүрэгтэй Засгийн газар энэ үүргээ хангалттай биелүүлэхгүй, ялангуяа нийгмийн хамгааллын чиглэлийн хуулиудыг сурталчлах үйл ажиллагаа дутмаг байгаагаас иргэд ямар нэг байдлаар төрөөс халамж хүртэх нөхцөл байдал үүссэн ч хуулийн хугацаанаас хоцрох, авах ёстой халамжаа хүртэж чадахгүй боломжоо алдах, хохирох байдал түгээмэл ажиглагдаж байна.

Иймд Улсын Их Хурлын гишүүн миний бие Монгол Улсын Их Хурлын тухай хуулийн 8 дугаар зүйлийн 8.1.13, 39 дүгээр зүйлийн 39.1.1 дэх заалтыг тус тус үндэслэн Танд дараах асуулгыг тавьж байна. Үүнд:

1. Нийгмийн хамгааллын салбарын багц хуулийн талаар иргэд, олон нийтэд мэдээлэл хүргэх, сурталчлах чиглэлээр Засгийн газар болон холбогдох яам, агентлагууд ямар арга хэмжээ авч, ажиллаж байгаа талаар;
2. Нийгмийн даатгалын сангаас олгох ажилгүйдлийн тэтгэмжийн тухай хуульд заасны дагуу сүүлийн таван жилийн байдлаар хичнээн хүн Ажилгүйдлийн тэтгэмжид хамрагдсан хийгээд үүнд хэдий хэмжээний хөрөнгө зарцуулсан талаар;
3. Улс төрийн сонгуулийн үр дүн, эрх баригч намын нөлөөллөөр төрийн албан хаагчдыг хоморголон халах явдал манай улсад цөөнгүй тохиолдох болсон. Шүүхийн шийдвэрийн дагуу хууль бусаар чөлөөлөгдсөн ажилтны ажилгүй байсан хугацааны цалин болон нийгмийн даатгалын шимтгэлийг нөхөн төлөх үүргийг ажил олгогч хүлээдэг. Захиргааны ерөнхий хуулийн 103 дугаар зүйлийн 103.1 дэх хэсэгт "Иргэн, хуулийн этгээдийн хохирлыг барагдуулсны улмаас өөрт учирсан хохирлыг захиргааны байгууллага Иргэний хуулийн 498.5-д заасны дагуу гэм буруутай албан тушаалтнаар буцааж төлүүлнэ.", мөн зүйлийн 103.2 дахь хэсэгт "Энэ хуулийн 103.1-д заасан гэм буруутай албан тушаалтнаар хохирлыг төлүүлэх үүргийг тухайн захиргааны байгууллагын дээд шатны байгууллагын дотоод аудитын нэгж хариуцна.", 103.3 дахь хэсэгт "Энэ хуулийн 103.2-т заасан дээд шатны байгууллагын дотоод аудитын нэгж байхгүй бол гэм буруутай албан тушаалтнаар хохирлыг төлүүлэх үүргийг төрийн аудитын байгууллага хариуцна." хэмээн тус тус заасан байдаг. Захиргааны ерөнхий

хууль хэрэгжиж эхэлснээс хойш хууль бусаар ажлаас чөлөөлөгдсөн хичнээн хүнд шүүхийн шийдвэрийн дагуу цалин, нийгмийн даатгалын шимтгэлийг нөхөн тооцож олгосон ба төрд болон нийгмийн даатгалын санд учруулсан тэрхүү хохирлыг буруутай албан тушаалтнаар нөхөн төлүүлсэн эсэх талаар;


4. Нийгмийн даатгалын сангаас олгох ажилгүйдлийн тэтгэмжийн тухай хуульд заасан хугацаа хоцроож, ажилгүйдлийн тэтгэмж авах хүсэлт ирүүлсэн даатгуулагчийн тоо, тэдгээрийн хүсэлтийг хэрхэн шийдвэрлэсэн талаар;

5. Нийгмийн даатгалын сангаас олгох үйлдвэрлэлийн осол, мэргэжлээс шалтгаалсан өвчний тэтгэвэр, тэтгэмж, төлбөрийн тухай хуулийн 2 дугаар зүйлийн 2.1 дэх хэсэгт "Даатгуулагч хөдөлмөрлөх үүргээ биелүүлэх явцад үйлдвэрлэлийн болон түүнтэй адилтгах хүчин зүйлийн үйлчлэлд өртөхийг үйлдвэрлэлийн осол гэнэ..." хэмээн заасан байдаг. Мөн хуулийн 13 дугаар зүйлд "Үйлдвэрлэлийн осол, мэргэжлээс шалтгаалсан өвчний улмаас хөдөлмөрийн чадвараа түр хугацаагаар алдсан даатгуулагч хөдөлмөрийн чадвар түр алдсаны тэтгэмж авах эрхтэй", 14 дүгээр зүйлийн 1 дэх хэсэгт "Үйлдвэрлэлийн осол, мэргэжлээс шалтгаалсан өвчний улмаас хөдөлмөрийн чадвараа түр хугацаагаар алдсан даатгуулагчид хөдөлмөрийн чадвар түр алдсаны тэтгэмжийг шимтгэл төлж ажилласан хугацааг үл харгалзан хөдөлмөрийн хөлс, түүнтэй адилтгах орлогын 100 хувиар бодож олгоно." гэж, мөн зүйлийн 2 дахь хэсэгт "Хөдөлмөрийн чадвар түр алдсаны тэтгэмжийг ажлын өдрөөр тооцно." гэж тус тус заасан. Эрүүл мэндийн ажилтнууд аливаа цар тахлын үед өвчний голомтот бүст ажиллаж байгаад халдвар авах нь элбэг тохиолддог бөгөөд үүнийг үйлдвэрлэлийн осолтой адилтган үзэх үндэслэлтэй юм. "КОВИД-19" цар тахлын үеэр "улаан бүс"-т ажиллаж байхдаа коронавирусын халдвар авсан эрүүл мэндийн ажилтнуудад эмчилгээ хийлгэсэн хугацаанд нь зөвхөн листний мөнгө олгосон талаар тэд олон нийтийн сүлжээгээр мэдээлж байсан. Тэгвэл "КОВИД-19" цар тахал Монгол Улсад тархаж эхэлснээс хойш хичнээн эрүүл мэндийн ажилтан ажил үүргээ гүйцэтгэж байх явцдаа коронавирусын халдвар авсан хийгээд тэдэнд эмчилгээ хийлгэх хугацааны цалинг хэрхэн тооцож олгосон талаарх мэдээллийг тус тус бэлтгэж ирүүлнэ үү.

Энэхүү асуулгын хариуг Монгол Улсын Их Хурлын тухай хуулийн 39 дүгээр зүйлийн 39.3 дахь хэсэгт заасан хугацаанд ирүүлж, Улсын Их Хурлын чуулганы нэгдсэн хуралдаанд танилцуулахыг Танаас хүсье.

Хүндэтгэсэн,

УЛСЫН ИХ ХУРЛЫН ГИШҮҮН



НАЯНТАЙН ГАНИБАЛ

2020090178